

TARIKH	12/4/2015	MUKASURAT	12
HARI	AKAD	RUANGAN	DALAM NEGERI

GST elektrik 300kWj ke atas sahaja

KUBANG PASU 11 April - Pengguna disarankan agar bijak dan berhemat ketika menggunakan bekalan elektrik jika tidak mahu dikenakan cukai barang dan perkhidmatan (GST) sebanyak enam peratus.

Timbalan Menteri Tenaga, Teknologi Hijau dan Air, Datuk Seri Mahdzir Khalid berkata, pelaksanaan cukai itu hanya tertakluk pada penggunaan elektrik melebihi 300 kilowatt sejam (kWj) atau mempunyai bil bulanan sekitar RM76 hingga RM77 sebulan.

Katanya, pelaksanaan cukai itu akan membuatkan pengguna lebih bertanggungjawab dan berhemat ketika menggunakan elektrik dalam kehidupan seharian.

"Sebelum ini, mungkin pengguna tidak kisah dengan bil yang dibayar setiap bulan serta tidak menyedari pembaziran elektrik yang dilakukan, namun selepas ini saya yakin perkara itu dapat dielakkan.

"Lagipun, caj itu hanya dikenakan bagi penggunaan elektrik melebihi 300kWj, jika jumlah yang digunakan kurang daripada itu maka pengguna tidak perlu risau,"



MAHDZIR KHALID

katanya kepada pemberita selepas menghadiri Pertandingan Golf Amal anjuran Yayasan Kemiskinan Darul Aman (Yaked) di Darul Aman Golf & Country Club di sini hari ini.

Menurut Mahdzir, beliau yakin cukai tersebut juga tidak akan

membebankan pengguna khususnya golongan berpendapatan rendah di negara ini.

"Sebagai contoh di kawasan saya di Padang Terap, lebih 90 peratus penduduk menggunakan elektrik kurang daripada paras tersebut, hanya 10 peratus yang bakal dikenakan caj enam peratus itu," ujarnya.

Dalam perkembangan lain, Mahdzir yang juga Pengerusi Yaked berkata, pihak yayasan bersetuju untuk membina sebuah pusat hemodialisis di pekan Kuala Nerang dengan kos sekitar RM350,000.

"Pusat ini bakal dilengkapi sebanyak lima mesin dialisis dan dijangka beroperasi sepenuhnya menjelang hujung tahun ini.

"Pusat ini mampu mengendalikan 15 pesakit sehari mengikut giliran dan pembinaannya kelak akan memberi kemudahan kepada penduduk setempat untuk mendapatkan perkhidmatan dialisis, selain yang terdapat di Hospital Kuala Nerang dan Hospital Sultanah Bahiyah, Alor Setar," katanya.